

Na osnovu člana 17. Pravilnika o kriterijima, postupku i načinu raspodjele stranih dozvola za prijevoz tereta domaćim prijevoznicima („Službeni glasnik BiH”, broj 35/02 i 79/09), ministar komunikacija i prometa Bosne i Hercegovine, objavljuje

O B A V J E Š T E N J E **o pokretanju postupka raspodjele CEMT dozvola i** **bilateralnih godišnjih dozvola za Francusku i Belgiju za 2015. godinu**

Obavještavaju se prijevoznici iz Bosne i Hercegovine koji obavljaju međunarodni cestovni prijevoz tereta da Ministarstvo komunikacija i prometa BiH (u daljnjem tekstu: Ministarstvo), na osnovu ovlaštenja iz člana 28. stav 1. Zakona o međunarodnom i međuentitetskom cestovnom prijevozu, pokreće postupak za raspodjelu CEMT dozvola i bilateralnih godišnjih dozvola za 2015. godinu.

I RASPODJELA CEMT DOZVOLA

Bosna i Hercegovina je od Sekretarijata Međunarodnog transportnog foruma za 2015. godinu dobila ukupno 1300 CEMT dozvola, od čega 1240 CEMT dozvola minimalno za vozila EKO-5 karakteristika i 60 CEMT dozvola minimalno EKO-6 karakteristika, prema slijedećem:

- **96 CEMT dozvola** koje važe za Austriju, a ne važe za Italiju i Grčku minimalno za vozila EKO-5 karakteristika (u daljnjem tekstu: **A**);
- **282 CEMT dozvola** koje važe za Italiju, a ne važe za Austriju i Grčku minimalno za vozila EKO-5 karakteristika (u daljnjem tekstu: **I**);
- **90 CEMT dozvola** koje važe za Grčku, a ne važe za Austriju i Italiju minimalno za vozila EKO-5 karakteristika (u daljnjem tekstu: **GR**);
- **772 CEMT dozvola** koje ne važe za Austriju, Italiju i Grčku minimalno za vozila EKO-5 karakteristika (u daljnjem tekstu: **O5**).
- **60 CEMT dozvola** koje ne važe za Austriju, Italiju i Grčku minimalno za vozila EKO-6 karakteristika (u daljnjem tekstu: **O6**).

CEMT dozvole za 2015. godinu dijele se u redovnom i ponovnom postupku. U redovnom postupku koji se provodi po ovom Obavještenju vršit će se raspodjela 95% CEMT dozvola. Preostale dozvole, 5 % od svake vrste dozvola (ukupno 65 CEMT dozvola) će se raspodjeljivati u ponovnom postupku.

II UVJETI ZA UČESTVOVANJE U POSTUPKU RASPODJELE CEMT DOZVOLA ZA 2015. GODINU

U postupku mogu učestvovati prijevoznici koji ispunjavaju slijedeće uvjete:

1. imaju licencu prijevoznika koja važi za obavljanje međunarodnog cestovnog prijevoza tereta;
2. nemaju neizmirenih obaveza po indirektnim porezima za prvih 6 mjeseci tekuće godine;
3. nemaju neizmirenih obaveza po direktnim porezima za prvih 6 mjeseci tekuće godine;
4. nemaju neizmirenih obaveza za doprinose za penziono i invalidsko osiguranje za prvih 6 mjeseci tekuće godine za sve zaposlene.

NAPOMENE:

Prijevoznici koji ne dokažu da ispunjavaju bilo koji od uvjeta iz tačaka 1. do 4. ovog poglavlja ne mogu učestvovati u postupku raspodjele CEMT dozvola.

III BLIŽI KRITERIJI ZA RASPODJELU CEMT DOZVOLA ZA 2015. GODINU

Raspodjela CEMT dozvola za 2015. godinu će se vršiti prema slijedećim bližim kriterijima:

1. Broj vozila i kvalitet voznog parka;
2. Obavljanje cestovnog prijevoza kao osnovne ili sporedne djelatnosti;
3. Pravilno korištenje CEMT dozvola.

Bliži kriteriji će se bodovati na slijedeći način:

1. Broj vozila i kvalitet voznog parka

Broj bodova po osnovu broja vozila i kvaliteta voznog parka predstavlja se obrascem: $nEKO5 \times 1 + nEKO6 \times 1,20$, gdje je n – broj vozila određene kategorije.

Pri tome:

1. za dodjelu dozvola EKO-5 se uzimaju u obzir vozila minimalno EKO-5 karakteristika;
2. za dodjelu dozvola EKO-6 se uzimaju u obzir vozila EKO-6 karakteristika;
3. prijavljeno vučno/teretno vozilo bez odgovarajućeg priključnog vozila računa se tako što se broj bodova za vozilo množi sa koeficijentom 0,20.

2. Obavljanje prijevoza kao osnovne ili sporedne djelatnosti

Za prijevoznika kome je transport osnovna (pretežna) djelatnost ukupan broj bodova množi se sa koeficijentom **1**, a za prijevoznika kome je transport sporedna djelatnost ukupan broj bodova množi se sa koeficijentom **0,3**.

3. Pravilno korištenje CEMT dozvola u 2014. godini

Prijevozniku će se ukupan broj bodova umanjiti za 5% za svaki mjesec za koji nije dostavljao pravilno popunjene izvještaje o korištenju CEMT dozvola za 2014. godinu. U obzir se uzimaju izvještaji o korištenju CEMT dozvola za 2014. godinu za period od 1.1. do 30.8.2014. godine.

Prijevozniku kome je oduzeta CEMT dozvola zbog nepravilnog korištenja u 2014. godini, ukoliko konačnim rješenjem nije izrečena strožija mjera, ukupan broj bodova se umanjuje za 20%.

Ukupan broj bodova može se, po ovom kriteriju, maksimalno umanjiti do 20%.

NAPOMENE:

U skladu s članom 16. Pravilnika u postupku se neće uzimati u obzir vozila sa manje od 12 tona nosivosti, skupovi vozila sa manje od 16 tona nosivosti, skupovi vozila sa više od 16 tona nosivosti kod kojih vučno vozilo ima manje od 10 tona nosivosti, niti vozila namijenjena za prijevoz nafte i naftnih derivata.

Pravilno korištenje CEMT dozvola u 2014. godini se utvrđuje isključivo na osnovu izvještaja o korištenju CEMT dozvola u 2014. godini koji su dostavljeni Ministarstvu, u skladu sa odredbama člana 16. stav (2) tačka h) i člana 24. Pravilnika.

IV RASPODJELA CEMT DOZVOLA U REDOVNOM POSTUPKU

Raspodjela CEMT dozvola za 2015. godinu u redovnom postupku će se izvršiti prema rang-listi koja će se formirati prema broju bodova dodijeljenim prema bližim kriterijima, a prema prioritetima iskazanim u zahtjevu prijevoznika, po svakoj vrsti dozvole. Pri tome, za učestvovanje u postupku dodjele predmetnih dozvola potrebno je da prijevoznik ima najmanje slijedeći broj bodova prema vrsti dozvole:

- 4,0 boda za učestvovanje u postupku dodjele CEMT dozvola A,
- 3,0 boda za učestvovanje u postupku dodjele CEMT dozvola I;
- 2,0 boda za učestvovanje u postupku dodjele CEMT dozvola GR;
- 1,5 bodova za učestvovanje u postupku dodjele CEMT dozvola O5 i O6.

NAPOMENE:

U postupku raspodjele prvo će se razmatrati prvi prioriteti svih prijevoznika koji su podnijeli zahtjeve te zatim svaki od narednih prioriteta svih prijevoznika. Ako je broj traženih CEMT dozvola koje se mogu dodijeliti primjenom gore navedenog načina bodovanja manji od broja raspoloživih CEMT dozvola, Komisija će izvršiti umanjeње minimalnog broja bodova potrebnog za dodjelu određene vrste dozvola za onoliko koliko je potrebno da se izvrši raspodjela. Umanjenje će se vršiti postepeno, za 0,2 boda.

U slučaju istog broja bodova, prednost se daje prijevozniku sa većim brojem zaposlenih vozača, koji posjeduju važeće iskaznice za vozača.

V PONOVI POSTUPAK, PREOSTALE DOZVOLE I REZERVNA LISTA

Preostale dozvole, 5 % od ukupnog broja u odnosu na svaku vrstu, će se raspodjeljivati u ponovnom postupku, koji obuhvata postupak odlučivanja po prigovorima i žalbama. Preostale dozvole, nakon okončanja postupka po žalbama, kao i dodijeljene dozvole koje nisu preuzete u predviđenom roku, će se dodijeliti prijevoznicima prema redoslijedu rang-liste po svakoj vrsti dozvole.

VI ZAHTJEV I POTREBNA DOKUMENTACIJA

Zahtjev za dodjelu CEMT dozvola za 2015. godinu se podnosi na obrascu koji se može preuzeti sa službene internet stranice Ministarstva <http://www.mkt.gov.ba> ili u prostorijama Ministarstva, Trg BiH br. 3, Sarajevo.

Prijevoznici koji imaju potrebu za prijevozom u Rusiju, obavezni su to posebno naznačiti na svom zahtjevu za dodjelu CEMT dozvola. Uz zahtjev za dodjelu CEMT dozvola za 2015. godinu prijevoznik mora priložiti original ili ovjerene kopije slijedećih dokumenata:

- 1) važeću licencu prijevoznika koja vrijedi za obavljanje međunarodnog cestovnog prijevoza tereta;
- 2) izvod iz sudskog registra kojim se dokazuje period registracije i iz kojeg se može utvrditi da je prijevoznik registriran za obavljanje djelatnosti cestovnog prijevoza tereta;
- 3) obavještenje o razvrstavanju poslovnog subjekta prema djelatnosti kojim se dokazuje osnovna (pretežna) djelatnost;
- 4) uvjerenje ili potvrdu izdatu od nadležnog tijela kojom se potvrđuje da podnositelj zahtjeva nema neizmirenih obaveza po indirektnim porezima za prvih 6 mjeseci tekuće godine;

- 5) uvjerenje ili potvrdu izdatu od nadležnog tijela kojom se potvrđuje da podnositelj zahtjeva nema neizmirenih obaveza po direktnim porezima za prvih 6 mjeseci tekuće godine;
- 6) uvjerenje ili potvrdu izdatu od nadležnog tijela kojom se potvrđuje da podnositelj zahtjeva nema neizmirenih obaveza za doprinose za penziona i invalidsko osiguranje za prvih 6 mjeseci tekuće godine za sve trenutno zaposlene.

Pored toga, podnositelj zahtjeva za svako kandidirano vozilo mora priložiti original ili ovjerene kopije važećih dokumenata na dan podnošenja zahtjeva, kako slijedi:

- 7) potvrdu o registraciji;
- 8) licencu za vozilo;
- 9) certifikat o usklađenosti sa tehničkim propisima CEMT-a za vozila, izdat od strane ovlaštenog predstavnika u Bosni i Hercegovini;
- 10) certifikat o usklađenosti sa tehničkim i sigurnosnim propisima CEMT-a, u skladu sa testiranim vrijednostima i sistemima kočenja, izdat od strane ovlaštenih institucija u Bosni i Hercegovini.

NAPOMENE:

Prijevoznici koji posjeduju licencu prijevoznika izdatu od strane Ministarstva nisu obavezni dostavljati dokumentaciju iz tačke 1. i 2. ovog poglavlja niti dostavljati dokumentaciju kojom dokazuju tehničku sposobnost vozila za koja posjeduju važeće licence izdate od strane Ministarstva (dokumenti iz tačke 7., 8., 9., i 10. ovog poglavlja).

Ispunjenost uvjeta koji se dokazuju dokumentima iz tačaka 1., 2., 7., 8., 9. i 10. ovog poglavlja će se utvrditi uvidom u službenu evidenciju Ministarstva.

Prijevoznici koji posjeduju licencu prijevoznika izdatu od strane Ministarstva, a koji su podnijeli zahtjev za izdavanje licence za vozilo Ministarstvu, kojima do dana objavljivanja ovog Obavještenja nije izdata važeća licenca za vozilo, kao i prijevoznici koji su zahtjev za izdavanje licence za vozilo podnijeli nakon dana objavljivanja ovog Obavještenja, dužni su, za to vozilo, dostaviti kompletnu dokumentaciju iz tačke 7., 8., 9. i 10. ovog poglavlja, da bi vozilo bilo vrednovano.

Prijevoznik koji ima zaključen reprogram o izmirenju obaveza po osnovu indirektnih ili direktnih poreza ili doprinosa za penziona i invalidsko osiguranje, a kojim su obuhvaćene ove obaveze za prvih 6 mjeseci tekuće godine, mora dostaviti original ili ovjerenu kopiju reprograma o izmirenju obaveza kao i original ili ovjerenu kopiju uvjerenja ili potvrde nadležnog tijela da redovno izmiruje obaveze iz reprograma.

Ako prijevoznik nije dostavio obavještenje o razvrstavanju poslovnog subjekta prema djelatnosti, smatrat će se da je djelatnost prijevoza sporedna djelatnost.

Dokumenti koji nisu dostavljeni kao original ili ovjerene kopije neće se uzimati u obzir. Ispunjenost uvjeta Ministarstvo utvrđuje uvidom u službenu dokumentaciju i službene evidencije Ministarstva, uvidom u dostavljenu dokumentaciju uz zahtjev, te službenom provjerom kod nadležnih organa Bosne i Hercegovine, entiteta i Brčko distrikta Bosne i Hercegovine.

VII RASPODJELA BILATERALNIH GODIŠNJIH DOZVOLA

Bosna i Hercegovina, u skladu sa međunarodnim bilateralnim sporazumima, vrši raspodjelu godišnjih bilateralnih dozvola, i to:

- 1) 5 dozvola koje važe za bilateralni prijevoz između Bosne i Hercegovine i Belgije i
- 2) 15 dozvola koje važe za bilateralni prijevoz između Bosne i Hercegovine i Francuske.

Zahtjevi za dodjelu dozvola iz tačke 1. i 2. ovog poglavlja se podnose na obrascu koji se može preuzeti sa službene internet stranice Ministarstva <http://www.mkt.gov.ba> ili u prostorijama Ministarstva, Trg BiH br. 3, Sarajevo. Prijevoznik, uz zahtjev, dostavlja i dokumentaciju propisanu u poglavlju VI ovog Obavještenja (tačka 1. do 10.). Prijevoznik koji je, pored ovog zahtjeva, podnio zahtjev za dodjelu CEMT dozvola, ne dostavlja posebno dokumentaciju, jer će se u obzir uzeti dokumentacija dostavljena uz zahtjev za dodjelu CEMT dozvola.

Dodjela dozvola iz ovog poglavlja vršit će se prema rang-listi, po broju bodova u skladu sa kriterijima iz tačke 1. i 2. definiranim u poglavlju III ovog Obavještenja.

VIII PROVJERA PRILOŽENE DOKUMENTACIJE

Ministarstvo ima pravo provjere priložene dokumentacije putem nadležnih tijela u Bosni i Hercegovini.

IX DOSTAVLJANJE ZAHTJEVA

Zahtjev sa traženom dokumentacijom za dodjelu CEMT dozvola za 2015. godinu i zahtjev sa traženom dokumentacijom za dodjelu bilateralnih godišnjih dozvola za Francusku i Belgiju za 2015. godinu podnosi se putem pošte, preporučeno, na adresu:

**Ministarstvo komunikacija i prometa BiH,
Trg BiH 3, 71 000 Sarajevo
«Komisija za raspodjelu CEMT dozvola - ne otvarati»**

Zahtjev podliježe plaćanju administrativne takse u iznosu od 5 KM.

Krajnji rok za podnošenje zahtjeva sa traženom dokumentacijom je **31.10.2014. godine.**

Sarajevo, septembar 2014. godine.

MINISTAR

Damir Hadžić